

Dumonda Deplazes (Cuira) concernent la stad 2018 sin l'alp da nursas Stutz

La stad 2018 sin l'alp Stutz è stada marcada da differents eveniments gravants. Uschia hai dà durant la stad pliras midadas da la pastriglia. Tenor l'uffizi d'agricultura e da geoinformaziun (UAG) èn vegnids annunziads 61 cas da nursas stgarpadas da lufs. Tenor il fittadin da l'alp èn però gia crappadas almain 50 nursas da malsognas (ecthyma contagiosum) avant las attatgas dals lufs. Durant la stad èn nursas scappadas pliras giadas en la Val Stussavgia vischina ed han stuì vegnir chatschadas enavos dal paster da là. Suenter la stad ad alp èn stadas sparidas tenor il UAG var 80 nursas.

En cas da tals eveniments extremis da questa dimensiun fissi da spetgar ch'il UAG sco uffizi responsabel intervegna ad ura, controllaschia dapli ed augmenta sia preschientscha sin l'alp. Ultra da quai fissi stà da spetgar che las autoritads avessan examinà ils eveniments en vista a la gronda polemica en las medias davart l'alp Stutz.

Sut quest aspect tschent jau las suandantas dumondas a la regenza:

1. Quantas nursas èn idas a perder ils ultims onns – dapi la reconuschienscha da l'alp Stutz sco alp pasturada permanentamain l'onn 2014 – durant mintga stad pervia da malsognas u accidents?
2. Vegn il UAG a garantir ch'i vegnan prendidas per l'alp Stutz – suenter ils eveniments da l'onn passà – quest onn mesiras efficazias per proteger la muntanera cun chauns da protecziun, cun pastgiras per la notg circumdadas d'ina saiv e cun ina pastriglia ch'è effectivamain permanentamain al lieu?
3. Quant aut è il total da las indemniziuns d'alpegiada e da las indemniziuns ecologicas ch'èn vegnidas pajadas la stad 2018 a tut las alps da nursas en il chantun Grischun?
4. Co vegni controllà da vart dal chantun, sche las cuntraprestaziuns correspundentas per las indemniziuns d'alpegiada pajadas èn effectivamain vegnidas furnidas da las persunas che mettan ad alp lur nursas?
5. Quant savens e da tgi vegnan controlladas las alps da nursas?
6. Vegnan verifitgads – cun emprovas da controlla – il dumber e la vegliadetgna da las nursas che vegnan inditgads mintgamai il di da referenza al UAG per calcular la contribuziun d'alpegiada?
7. Èsi previs d'endatar en il sistem d'informaziun geografica SIG las alps da nursas inclusiv las pastgiras circumdadas d'ina saiv?

Cuira, ils 12 da favrer 2019

Deplazes (Cuira), Atanes, Baselgia-Brunner, Cahenzli-Philipp, Caviezel (Cuira), Degiacomi, Della Cà, Felix, Gasser, Hofmann, Kappeler, Locher Benguerel, Müller (Favugn), Noi-Togni, Perl, Preisig, Rettich, Rutishauser, Schwärzel, Thöny, von Ballmoos, Wieland